

壯悔堂集

冊二

壯悔堂文集卷四

睢陽侯方域朝宗著

奏議

代司徒公論流賊形勢奏

臣謹昧死上奏寇患積十五年而始大非可一朝圖也由秦入豫一敗汪喬年再敗傅宗龍而天下之強兵勁馬皆爲賊有矣賊騎數萬爲一隊飄忽若風雨過無堅城因資於我官軍但尾其後問所向而已卒或及之馬隤士餓甚且以賜劍之靈不能使閉城之縣令出門一見運一束芻饋一斛米此其所以往往挫衄也今賊氛告迫全豫已陷其七八藩王待救望若雲霓然自他日言之中原爲天下腹心自今日言之乃糜破之區耳自藩王言之維城固重自天下安危大計言之則維城當不急於社稷臣爲諸道統帥身任平賊豈可言舍汴不援但臣所統七鎮合之不過數萬人而四鎮尙未到也馮河而

前無論輕身非長子之義亦使羣賊望之測其虛實玩易朝廷矣賊中情形臣已具悉大約饑則聚掠飽則棄餘已因之糧不知積蓄地生之利未閑屯種且多久逋思歸中宵雨泣以衆積強難驟撓其鋒然其強易散可持久而定也賊中聯營各部如曹操一支窺李自成有兼并之心陰相猜貳而袁時中有步卒二三十萬則已去而顯與爲敵矣惟是彼之情實難以猝與我通而當事秉鉞者避款賊之嫌又皆畏首畏尾不肯一擔當利害爲國遠圖以致機會之來覲面坐失此卽朝更一撫夕易一督而省臺言兵事之臣章疏日數十上豈能鎔銖有濟哉誠能省朝中議論行閫外軍法不顧責備不徇人情厚集兵力養威蓄重伺隙設間潰其腹心賊必變自內生惟在任事之人肯捐去形迹一捨其身與否而陛下聽之斷與不斷任之力與不力耳故爲今計苟有確見莫若以河南委之令保定撫臣楊進山東撫臣王永吉北護河鳳陽撫臣馬士英淮徐撫臣史可法南遏賊

衝而以秦陝督臣孫傳庭塞潼關臣率左良玉固荆襄凡此所以斷其奔佚之路也臣鄉自賊中來者皆言百萬今且以人五十萬馬十萬計人食日一升合馬食日三升合則是所至之處日得八千鐘粟也中原赤地千里望絕人煙自茲以往安所致此哉目今兵強無過良玉良玉爲臣舊部每對臣便涕泣有報効之心三過臣里皆向臣老父叩頭不敢擾及草木私恩如此豈肯負國但從前督撫駕馭乖方兼之兵多食寡調遣爲難誠使臣得馳赴其軍宣諭將士鼓以忠義用三楚之糧養全鎮之兵臣不就度支關餉陛下亦不必下軍令狀責取戰期機有可乘卽東出與孫傳庭合羣賊腹背饑擾馳突無所不相屠滅必自降散舍此不圖而欲急已潰之中原失可扼之險要蛇豕肆釁恐其禍有不止於藩王者此社稷之憂而非小小成敗之計也臣謹悚息待命之至

奏入朝廷不許不三年而燕京之社稷墟矣吾謀適不用耳莫遂

謂秦無人也讀之三歎

靜子

代司徒公屯田奏議

臣竊見從來屯田之利人人言之而其大概不過兩語在腹裏則屯田少而隱占多宜用清察在塞下則屯田多而耕種少宜用開墾清察法行而所以實軍伍者卽寓于其間開墾法行而所以限戎馬者卽寓於其中所患者惟無實心任事之臣徇因循則疑更絃之爲擾獵捷效則厭蓄艾之爲遲坐使自然之利棄而不收甚可惜也臣謹廣詢衆論參攷故實諸如官屯軍屯兵屯民屯商屯之以人異也腹屯邊屯之以地異也條分縷析期于明便可行算計見效別著墾種事宜而以攷課信任二議終之誠見天下有治人原無治法貴力行不貴多言伏惟陛下以重農貴粟爲本圖以知人善任爲綱領專責以課其成久任以收其後予以復 高皇帝時養軍百萬不費民間一粒之盛庶有期乎雖然臣所言者不過其大略而已各省直事體

未必盡同或宜于昔而不宜于今或便于此而不便于彼自非身在地方不能悉其曲折仍宜令各該撫按督率所司悉心規畫酌量時勢遵依先奉聖旨所云塞下作何營護腹裏作何綜理條議詳確約期具報以憑覆覈上請庶制以斟酌而盡利法以潤澤而宜民其有裨乎國計軍儲非淺鮮也某月日臣某謹奏

一議官屯今天下屯政之壞弊如鼠穴而官屯與居一焉攷永樂時著令每一都司另撥旗軍十一名耕種號曰樣田蓋欲據所收籽粒多寡以辨別歲之豐凶地之肥瘠軍之勤惰初未嘗以田與官也始于隆慶二年將宣大屯田開墾成業者每十頃內給軍官五十畝爲養廉之資而又令各自行開種若副參不及一百頃守備以下不及一十頃者參論戒飭其立法初意豈不期將領偏裨等官督率家丁克勤稼穡爲士卒倡哉今則強役部曲占收籽粒至如宣大山西諸鎮閫帥肆其鯨吞矣延寧甘固諸鎮蔭職恣其蠶食矣肥區歸己而

以其瘠磽者移之軍士久則竄易厥籍而糧彌不均糧不均於是不得不寄甲于勢要而欺隱遂多欺隱多於是不得不攤稅於佃軍而包賠愈苦流病相仍非朝伊夕人鮮樂耕野多曠土職此之繇似宜稍爲限制總兵受田不得過二百畝副總兵不得過一百五十畝參遊都司不得過一百畝坐營守備不得過七十畝俱督率家丁耕種有多餘者卽令退歸屯田數內給軍領種照則徵科敢於限外多占一畝擅撥一軍者卽以贓論而又通計所部墾田多寡以爲殿最果勞來有方副參至一百頃遊擊都司至五十頃坐營守備至三十頃千把等官至十頃者聽撫按覈實舉薦敘陞若副參不及二十頃遊擊都司不及十頃坐營守備以下不及五頃者聽該道報部題參降罰敢有冒無作有欺荒爲熟該管轄者并治之令出惟行國初原額庶可復乎昔唐郭子儀以河中軍苦乏食乃自耕百畝將佐以是爲差於是士卒皆不勸而耕其後京西營田節度使劉昌亦身率士墾

田三年而軍有羨食兵械銳新邊障安寧此皆官屯龜鑑也伏候聖裁

一議軍屯軍政之壞蓋未如今日者也籍無用之人蠹有限之粟而軍之外又別賦民以養兵是昔也兵與農爲二而今也兵與農與軍爲三矣宋臣朱熹有言恤民之實在省賦省賦之實在治軍軍誠練則得一軍可省一兵省一兵便贏一餉推而上之所贏當不貲而或者曰軍不可調也戍守不可使虛也臣愚將有以待之皇帝初定制每衛所軍士以三分守城七分屯種又有二八四六一九中半等例皆以田土肥瘠地方衝緩爲差蓋卽先王寓兵于農之意無事爲農有事卽軍也而今頂種者無以異于民佃享軍之產無軍之差失其意已甚至軍田民種則不獨軍無其軍且幾屯無其屯夫典賣之禁故在也還官之條非不炳如也然相沿已久將概引律例以從事彼不聞然羣肆阻撓則計出于冒名詭託已耳所宜行令各衛所無

論軍民舍餘雜色但種軍屯卽應軍役其一軍之屯而衆佃者則朋出一丁務于農隙之時分番操練遇警則城操之軍不妨調發而卽以屯軍代之戍守合天下屯田共六十四萬三千餘頃各處屯軍受田則例多寡不一折中推算當不下一百二十餘萬人有此一百二十餘萬人之數以備戍守便可于城操軍內挑出一百二十餘萬人之數以資調發不煩召募不增餽餉而緩急舉有所恃誠國家無形之鉅利也其或民籍人戶慮一受田則世世受軍之累許其吐出還官別召軍餘頂種從此盜典盜賣之弊亦將不禁而自絕卽爲祛蠹計法莫逾此伏候聖裁

一議兵屯夫天下無益田而有增兵有侵歲而無損餉度支仰屋之憂豈有已時乎聞之兵法屯田一石可當轉輸二十石皇帝從宋訥策守邊士卒備譏察外悉令屯田每將以東西五百里爲制耕作以時訓練有法遇敵則戰寇去則耕景泰時邊臣言沿邊關營城堡附

近空閑地土甚多將見在關營軍士二分守關一分屯種見在守城
軍士一分操練一分屯種近唯天津海防營令兩兵共一屯一主耕
一主戰深爲得法今宜卽依其例籍並邊空閑地之可開墾者於新
舊尺籍內姑以一分負耒耜而留其二分任防守如有客兵者則以
客兵防守以主兵耕其無客兵者則挑其精壯防守以不任戰者耕
每三人共一屯每一屯定三十畝其所收穫則均分焉農具牛種力
不贍者量許于餉銀節曠內借支有秋之後照時估取償如數而止
宋臣廖剛有云執耒之勞較之操戈之危豈不特易況所食者公家
之糧所享者入己之粒其必竭蹶以就無疑矣且人共爲佃卽人共
爲守以兵衛農綽有餘裕脫遇不測燒穀入保亦不過與坐而不耕
等耳至所墾之田給爲永業俟二年後量照下則起科蓋但求積粟
之多則士飽馬騰戰守有藉而邊境之上桑麻遍野穀價必平召買
旣賤運費亦省公私兩利無過是者昔晉羊祜鎮淮襄減戍邏之半

墾田八百餘頃當其始至軍無百日之糧及至季歲乃有十年之積已事明効照耀簡編豈有可行于古而不可行于今者哉伏候聖裁一議民屯屯田因兵屯得名則固以兵耕若夫募民耕之而分里築室以居其人如晁錯疏所謂相徙以實塞下者則以營名其實用民而非兵也乃又有民自墾蕪不繇官募而第爲之畫其疆井之數量行起科者謂之民屯宋制兵屯以使臣主之民屯以縣令主之而魏了翁疏則曰墾田之效多于屯田其言良爲有見今江南杼柚幾空而秦晉荆豫之間羣盜蠭起民生無聊將盡化耒耜爲刀劍則驅浮惰招流移誠不可緩昔漢人有徙遠方民以實廣虛之法而今恐不可行亦惟善用其勞來之術而已一曰因之一曰利導之一曰整齊之何謂因大荒大祲蘇軾所謂民輕離其鄉之時也以臣所聞見畿輔棄田甚廣津涿水利無窮卽並邊膏腴亦不乏又如淮鳳之區齊魯之域阡陌相連灌莽彌望山陝等處洊經兵燹散而四方州里蕭

條田土蕪廢謂宜令所在各有司加意招徠鼓舞開墾係額內者俟三年後起科係額外者俟五年後起科起科分數雖上中之田止照下田則例其農器牛具亦當量行借動使其興作秋成之後漸續補還王者以天下爲家苟有濟于吾民自不宜愛惜小費況費于帑而終償于田乎如是則人可無流移而野可無曠土是之謂因何謂利導倣晁錯拜爵實塞下之意虞集軍官授富民之法試下令曰能闢五百畝者予秩視百戶能闢千畝者予秩視千戶能闢二千畝者予秩視指揮僉事等而上之進秩有差俟三年後以上中下則勻算照中則起科其在邊地者仍照下則起科果歲入如額卽給與初下令時職銜仍于籽粒中撥三分之一爲月俸其四百畝以下者量授散官職銜三百畝以下者給告身冠帶二百畝以下至一百畝引進而獎勵之若是而民之褰裳赴者什二三矣幹止既定必許其占籍長子孫得以三途進又疑土著之民不能相容則另立屯額若是而民

之赴者什七八矣或謂若輩非武功何得昇武功爵然田墾而食足
食足而兵強又何武功之足羨或又謂進取格立無乃爲冒籍開徑
則第令若輩來時卽登其所攜與俱者于版更無虞滋他族也是之
謂利導何謂整齊令邊腹有司盡報其所部荒田可開墾者兩直報
各道各省報布政司近限三月內遠限六月內悉行報部一面督率
開荒如隱匿不報聽撫按察奏以不職論而獨慮成熟之後或有妄
認世產希圖吞霸者則惟當開墾時卽與改名爲屯給帖承掌俾此
疆彼界瞭然難混雖有新軍補役逃戶復業亦不許告爭有勢家豪
右恃強橫占者必罪不宥是之謂整齊雖然勸民要矣勸吏亟焉請
令凡考課州邑之長必以境內開荒之饒乏爲殿最雖他政當併論
而農事在所先漢臣王粲所謂農益地闢則吏受大賞農損地狹則
吏受重罰者尤今日所宜講求也伏候聖裁

一議商屯甚哉制之不可輕變也國初計邊地寒又受兵且耕且守

力最艱乃通商中鹽以維之令賈人輸粟邊郡官給之引赴鹽所領
鹽轉鬻永樂時粟二斗五升得鹽一引商贏利過當爭趨之各自設
保伍募衆督耕於是邊地盡墾而塞下粟充溢露積饒于中土屯軍
亦因其保障守望相助得力耕當此之時各鎮軍餉就其地足給無
有所謂太倉年例者閭左自正供外亦無他財賦蒸庶樂業其後邊
事漸興逮弘治中部臣葉淇見謂賈人輸薄而獲厚利遂奏令納銀
運司解部部分輸各邊於是商各散歸逐本業營貲而故所墾田盡
廢邊地米價頓湧一遇災荒卽積錢如山金如土而米無從出鹽課
不足給食又塞上尺籍日增至傾左藏以贍之加之遼事起民賦愈
重而東南力竭矣雖至嘉靖中仍復初制然不過僉報土著及積攬
之人多易糧粟與官攬兌支無復墾土重以私鹽盛行官引壅滯倉
鈔莫售勢不得不減價投於圉戶資空本壓商皆逃徙每餉司北併
鹽糧如蹈湯火不啻議者徒見邊方米豆不足漫思將餘課之銀悉

改納邊方本色邊商聞之無不疾首蹙額審行之不至于無商不止也今欲籌所以恤之則亦不外開種商屯而已請于沿邊拋荒地地察有可墾者每商量給百畝或五十畝填與印信照帖永不起科及米豆赴倉之日則惟酌時估以定斛量飭官額而革常例庶耗費既少而輸納無難也然其要者則尤自疏通鹽法始必禁私販於產鹽之地以清其源銷壅引於行鹽之區以導其流而又嚴掣摯杜浮課以制其旁溢若是則引鹽無滯引鹽無滯則倉鈔速售彼執母權子之徒有不負耒耜而樂趨塞下者耶伏候聖裁

一議腹屯今之言修屯法者不過清舊墾新二事而已而墾之課効賒不如清之計功實有人于此本有之產荒落不治徒馳思于埭莽之鄉而虛冀不必然之獲未敢以爲得也方今屯法大壞極矣大抵膏腴之區合併于巨室鄰界之處侵奪于豪強雖然衛所未改南陽之產猶可問也後湖具存故府之籍尙可稽也請令各省直督屯按

臣道臣細將魚鱗老冊與屯田戶繇逐一勘對頃畝條段務取相符
四至坐落毋容朦混備開見在耕種者若干有無包占欺隱荒蕪坍
塌者若干應否召佃開除卽以大明會典所載萬曆六年見額爲則
除節年續報開墾數目自應增入額內畫一督徵其縮于原額者務
要詳察起自何年因何緣故近省近鎮限十月遠省遠鎮限十二月
報部稽察各道能清出隱地百頃以上糧三百石以上者臣部特薦
紀錄進而得地三百頃以上糧千石以上者特薦超擢如全無清覈
及造冊不明或違誤限期者糾治參罰蓋必地糧之實額了然而後
興釐之事乃可措手然則丈量之法雖不必盡施而亦不必不施也
彼頃畝如舊者可勿問矣有如按冊則有而問田則無非履畝而丈
之何以矚侵牟詭計之奸卽其差額覈其畝數大不過一都一里小
不出一圖一區豈遂騷擾乎卽造報之冊見謂無用而實未嘗無用
彼滄桑變易者固當亟豁若夫弱被強吞而不敢言肥以瘠易而莫

能慙非書版而藏之何以存溝塗封植之券管收必明除在必晰三年朝覲則令投冊于臣部十年改造仍當冊報于後湖豈曰繁文乎繇是出隱占之浮者而均之據原額之湮者而種之按冊索屯按屯索丁丁卽爲軍屯卽爲餉從前私買私賣爲侵爲匿之罪咸與赦除蕩然與人更始萬無不濟乃其因革之宜則猶有當議者國初開設屯田派坐甚遠幅幘甚廣名隸本衛地落他處有相去數百里者有相去數千里者軍產民產相錯其間屯伍之官不能照管大半爲豪民所占蓋地廣而賦輕故豪民喜得入手卽報新墾於州縣而屯田自此消滅矣除同省而越府者清察猶易如江西之南昌衛饒州撫州等所屯田坐落南直地方河南潁川衛潁川所亦然似此類者恐難勝數鞭長不及漁侵莫問謂宜比照嘉靖四十年將山西寧山衛平定州屯田歸併比直屯院管理事例通行改正徙軍就屯如不願往卽招本處軍人頂種徵其籽粒轉解原管衛所以充官軍俸糧允